

Date – 21/11/2024

Time - 18:30 Hrs

1. LAD Minister Pu C. Lalsawivunga chuan sorkarin Village Council term thla 6 pawttawia inthlan hun a sawn hma chhan chu inthlan huaihawt hautak tak chhawk zangkhai tura hmalakna tur a ni a ti.
2. Mizoram Chief Secretary atan Pu Khilli Ram Meena, IAS, AGMUT Cadre kum 1993 batch ruat a ni.
3. Prime Minister Narendra Modia chu Guyana ram chawimawina sang ber hlan a ni.
4. President Draupadi Murmu-i chuan vawiin tlai khan ni hnih cham turin Hyderabad a thleng.

<><><>

#### C TERM REACTION

Local Administration Department Minister Pu C. Lalsawivunga chuan sorkarin Village Council term thla 6 pawttawia inthlan hun a sawn hma chhan chu inthlan huaihawt hautak tak chhawk zangkhai tura hmalakna tur a ni a ti. Akashvani corr zawhna chhang Minister chuan dan pangngaia a kal chuan nakum financial year chung hian election lian pui pui pali buatsaih a ngai dawn a. Village Council leh Local Council election chu August/September thlaah neih tur a ni a, LADC inthlanpui November thla bawrah neih tur niin, a kumleh 2026 January/February thlaah AMC inthlan huaihawt a ngai leh dawn baw a ni a ti. Minister chuan 15 Finance Commission period zuih ral lamah India ram a awm mek tih sawiin hemi hnuaiah hian sum hnar lian ber zinga pakhat, Post Devolution Revenue Deficit Grant chu kum tin an titla hniam zel a ni a ti a. 15 FC period chungin Mizoram chu cheng vbc 6544 dawng turin tih a ni a, nakum Financial Year (2025-26) ah chuan nasa taka tlak hniam belh leh in thla khatah cheng vbc 48 leh nuai 83 vel chuah Mizoramin a dawng tawh dawn a ti a. Nakum lama election neih tur pali zinga a hautak ber VC Election bik chu sawn hma ni se, sum leh pai dinhmun engemaw chen a chhawk zangkhai thei ang tih ngaihtuah chung a thutlukna siam an nih thu a sawi a ni.

VC Term pawhtawi a ni hian MNF party a barakhaih hle tih MNF Senior Vice President Dr. R. Lalthangliana chuan Akashvani palai zawhna chhangin a sawi a, Village Council chu democracy ramah chuan an hlut thu leh khawtlang enkawltu pawimawh sorkar pawhin a hman tangkai em em a ni a ti a. Chief Minister approval tih lawnga notification a awm chu eng nge a chhan ni ang tih chu an zawhna lian tak a nih thu a sawi a. Village Council Association hotute pawhin engmah an hriat loh thu sawiin notification-a inthawn teh thut chu thil thleng zen zen lo a ni a ti.

Mizoram Pradesh Congress Committee, MPCC President Pu Lal Thanzara chuan Congress leh MNF sorkar lai pawhin inthlan hautak tak tak an hmachhawn ve thin tih a sawi a. Akashvani zawhna chhangin Pu Lal Thanzara chuan chanchinbuah party dang VC an la tam avangin hnathawh a har tih Home Minister in a sawi a lo hmuh thu sawiin, tun sorkarin ngaihtuahna dang an neih bik tak chhan ni thei chu anmahni party lo VC ten hmasawna hna te an thawk ang tih an hlau ni berin a langa a hriat thu a sawi a. Party dang an ring lo hrim hrim tih sawiin ZPM party chiah an ring a nih chuan an kawng a bumboh viau a rin thu a sawi a ni. Village Council term pawhtawi chungchanga kan corr report lo ngaithla ang.

Mizorama Village Council inthlan hnukung ber chu kum 2020 Aug ni 27 khan buatsaih a ni a, VC term hi kum 5 chungh niin sorkar chuan tuna term hman mek chu Section 5 of the Lushai Hill Distret (Village Council ) Act, 1953-in sorkar thuneihna a pek anga thla 6 pawhtawi a rel a, hemi ang hian kumthar feb ni 19 ah tuna VC term hi a tawp tur thu LAD chuan hriattirna vawiin khan a tichhuak a ni. VC term hi nakum feb thla thleng chauh a nih dawn tak avang hian inthlan hun hi Feb thla ral hma ngeia neih a ni dawn niin a lang a, inthlan hun tur erawh State Election Commission in a la puang dawn a ni.

<><><>

#### NEW CHIEF SECRETARY

Mizoram Chief Secretary atan Pu Khilli Ram Meena, IAS, AGMUT Cadre kum 1993 batch ruat a ni. Sorkar laipui Ministry of Home Affairs chuan Mizoram Chief Secretary thar ruatna thupek hi tichhuakin ani hian Mizoram Chief Secretary chhuak ta Pi Renu Sharma a thlak dawn a ni.

<><><>

## **LALREMSIAMI**

Mizo nula Lalremsiami Hmar telna India hmeichhe Hockey team chu Women's Asian Champions Trophy 2024 khelh zawh takah an champion a. India hian nizan khan final-ah China chu 1-0 in an hneh a ni. Inelna hi Bihar-ah neih niin, India an champion theih nan Lalremsiami hian tha a thawh hlawk hle a, final match bikah hian 'Player of the Match' atan thlan a ni a, tournament pumpuih goal thum (3) a khung. Akashvani News Aizawl zawhna chhangin Lalremsiami chuan:-

Chief Minister Pu Lalduhoma chuan, Women's Asian Champions 2024 final a hnehna chang India team te a lawmpui a, a bik takin Mizo nula Lalremsiami Player of the Match a ni chu a lawmpuiin a chhuang takzet tih a sawi a. A kal zelnaah duhsakna a hlan bakah Mizo tihmingthatu lo nih chhonzawm zel turin a fuih bawk. Sports Minister Pu Lalnghinglova Hmar pawhin Lalremsiami a chhuan thu leh a thlen chin atanga hmasawn zel tura a duh thu a sawi bawk. Women's Asian Champions Trophy 2024-ah hian Asia rama Hockey khel thiam ram paruk - India, China, Japan, Malaysia, South Korea leh Thailand te an inel a, group match-ah an inkhelh kual vek hnuin a sang pali ten semifinal an lut a, chumi hnuah final khelh zui leh a ni.

<><><>

## **MFA SUSPENDS**

Mizoram Football Association (MFA) chuan Mizoram Premier League khelh zawh taka player pariat hremna an ti chhuak a, player a hremte hi sum hmanga inthapna a an inhnamhnawih vang a ni. MFA chuan nimin khan thuchhuah siamin, Mizoram Premier League 11-a Football zahawmna tibawrhbangtu player te, official te leh Football Club chungah thununna a lo lek tawh a. Thil dik lo zawn chhuah kawnga Mizoram Football Association thawhpui a, thlawp tlat tute leh an player ten thu dik puang chhuak a, game in hma a sawn nana an hmalakna an tanpuina zarah, Football zahawmna leh thianghlimna tihbawrhban kawnga player inhnamhnawih an hriat belh zel a ni an ti a, player an hremte chungah thununna lek a ngai chhonzawm ta zel chu pawin an ti tak zet tih an sawi. MFA hian tun thla tir lam khan MPL 11-a sum inthapna chungchangah hian player leh coaching staff mi 25 a lo hrem tawh bawk.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

<><><>

## **PM IN GUYANA**

Prime Minister Narendra Modia chu Guyana ram chawimawina sang ber hlan a ni. Ram thlanglai te tana khawvel huapa kaihrwaitu leh an chanvo hauhsaktu anih avang leh India leh Guyana inlaichinna atana a thawhhlawk em avangin Guyana sawrkar chuan Order of Excellence award hi a hlan a ni. Pu Modia hi Guyana President Dr. Irfaan Ali chuan vawiin khan State Guest House-ah ropui takin he chawimawina hi a hlan a ni. Prime Minister Modia chuan Dr Irfaan Ali hnenah lawmthu sawiin a chawimawina dawn chu India mipui tan a hlan a. Ram pahnihte inthianthatna hun rei tak ata tawh chhawm nun zelna tur anih thu a sawi. Pu Modia hian Guyana-ah Parliament ah zanin hian thu a sawi dawn a ni. Kan COrr report ilo ngaithla ang u.

<><><>

## **PRESIDENT**

President Draupadi Murmu-i chuan vawiin tlai khan ni hnih cham turin Hyderabad a thleng. Pi Murmu-i hian zaninah "Koti Deepotsavam" ah hun a hmang ang a. Raj Bhavan-ah thu a sawi bawk ang. Koti Deepotsavam ah hian eng tam tak chhit a ni ang a. Hei bakah hian President Murmu-i hian naktukah 4th International Cultural festiva- Lok Manthan a hawng dawn bawk a. Tun hum hi India chhim lama Lok Mantham hman anih vawi khatna a ni. Ram 12 atangin he kutah hian aiawh an tel dawn a ni.

<><><>

## **PM MANN KI BAAT**

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 116-na tur a ni ang. He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>